


DEN AMBIENTE....

Fotos y Texto: Jan Poets

ARELYS FRANKEN TA LANSA SU PRODUCCION CLASICO... "E MOTIBO"....

** E talentoso cantante, Arelys Franken, kende aña pasa a causa un impacto grandi cu su exitoso cancion di Pasco, "Un Instrumento di Pas", ta bolbe lansa un tremendo cancion di Pasco pa e temporada di fin di aña aki. Sin duda Arelys Franken no ta un artista desconoci pa e pueblo di Aruba. Hopi tabata e peticionnan pa un cancion di Pasco e aña aki atrobe di Arelys Franken y un biaha mas



Arelys Franken ta presenta un cancion cu ta hiba e number "E Motibo". E cancion aki ta un produccion clasico traduci na papiamento cual Arelys ta interpreta cu su bunita bos y ta priminti di cautiva e curason di Aruba un biaha mas. Elwin Rincones e propietario di Pro Q Studios, un compania di produccion, grabashon, diseño y replicashon di disco compacto, a mira e joya


artistico den Arelys Franken cual a ofrece pa produci Arelys y ta completamente convenci cu e produccion aki lo duna un toke special na e temporada di Pasco. "E motibo" ta un di e produccionnan riba e disco compacto cu ta hiba e number "Pro Q goes Christmas". Por a compronde cu e CD aki ya ta riba mercado, cual ta obtenible serca e propio talentoso cantante Arelys Franken...

GRUPO FORTALESA GRABANDO NAN VIDEO CLIP....

** Grupo Gaitero Fortalesa ta cumpli tres aña di existencia y ya caba a pone un disco compacto nobo riba plaza. Grupo Fortalesa ta un grupo cu ta consisti di musiconan creyente den Jesucristo di cinco diferente Iglesia. E proposito di e grupo aki ta pa mostra atravez di nan musica cu Cristo Jesus ta e motibo cu awe os tin Pasco. Pasco ta e demostracion mas grandi di amor cu universo hama a experiencia. Dios a stima mundo asina tanto cu El a manda su unico Yiu pa esnan cu ta kere den dje por haya

bida eterno. P'esey Grupo Fortalesa su mensahe central ta Cristo. Cada cantica riba e CD den su totalidad ta exalta Cristo na prome lugar. Scuchando e CD di Grupo Fortalesa, nos ta saca conclusion cu e grupo aki ta un grupo di gaita di un nivel hopi halto. E CD ta prepara cuidadosamente bao direccion di e maestro Doodle Sophia y Roberto Cortes cu ta dos gaitero di hopi experiencia y gran trayectoria. Musiconan di taya manera Ivan Quandus, Carlos Bislip, Delbert Bernabela, Juan Tromp, Federico Martis,

Hildward Croes, Johnny Croes y otronan mas a participa sea como musico y ingeniero di e CD di Fortalesa. Actualmente ya grupo Fortalesa ta tocando den tur iglesianan na Aruba. Tambe Grupo Fortalesa ta presenta na diferente lugarnan riba nos Isla. Diadomingo 30 di november proximo, Grupo Fortalesa lo ta den un concierto di Gospel di gaita hunto cu Gaita Ministerio y Alabansa di Aruba y un grupo di gaita gospel di Bonaire. Carchinan pa e concierto of un CD, yama na 9662659/5640050/96451 55...



** Aki por aprecia e momentonan di e grabacion pa e ritmo di wiri, cual grabacion a ser realiza pa Leo Maduro kende ta encarga pa produci e video clip di Grupo Fortalesa. Demas fotonan ta ilustra Maestro Doodle Sophia riba su cuarta y tambe na momento cu maestro Doodle Sophia ta warm up su dedenan magico hunto cu algun integrantenan di Grupo Fortalesa, prome cu el a graba su parti. E produccion completo aki ta priminti di bay ta uno super exitoso...